

Na osnovu člana IV 4. a. Ustava Bosne i Hercegovine, Parlamentarna skupština Bosne i Hercegovine, na sjednici Predstavničkog doma održanoj 13. decembra 2001. godine, i na sjednici Doma naroda održanoj 20. decembra 2001. godine, usvojila je

ZAKON

O LIČNOJ KARTI DRŽAVLJANA BOSNE I HERCEGOVINE

Poglavlje I - OPŠTE ODREDBE

Član 1.

Ovim zakonom se uređuje lična karta državljana Bosne i Hercegovine (u daljem tekstu: BiH).

Svrha ovog zakona je uspostavljanje identifikacije građana BiH i izdavanje ličnih karata svakom državljaninu.

Sve odredbe ovog zakona odnose se jednako na sve državljane BiH (u daljem tekstu: državljani), osim ako nije drugačije predviđeno u posebnim odredbama u poglavlju VIII ovog zakona.

Lična karta je jedinstvena za sve državljane i važi na cijeloj teritoriji BiH.

Član 2.

Lična karta je javna isprava kojom se dokazuje identitet, činjenica mjesta i datuma rođenja, prebivališta odnosno boravišta za raseljeno lice i državljanstva BiH.

Državljanin BiH mogu koristiti ličnu kartu za prelazak državne granice u određenim okolnostima i pod uslovima utvrđenim bilateralnim sporazumima između BiH i druge države.

Član 3.

Državljanin stariji od 18 godina sa prebivalištem u BiH dužan je da ima ličnu kartu izdatu u mjestu prebivališta.

Raseljeno lice sa boravištem u BiH (u daljem tekstu: raseljeno lice) dužno je da ima ličnu kartu izdatu u mjestu boravišta.

Lice koje je izgubilo državljanstvo BiH ili koje više nema prebivalište u BiH mora bez odlaganja vratiti ličnu kartu nadležnom organu.

Državljanin može imati samo jednu ličnu kartu i nije dužan da je da na uvid ako to nije predviđeno zakonom.

Državljanin ne smije ustupiti svoju ličnu kartu drugom licu niti smije koristiti kao svoju ličnu kartu drugog lica.

Državljanin ne može koristiti ličnu kartu drugog lica u svrhu pribavljanja bilo kakve koristi ili prava.

Član 4.

Prikupljanje informacija na osnovu ovog zakona obavlja se u skladu sa BiH Zakonom o zaštiti ličnih podataka i BiH Zakonom o centralnoj evidenciji i razmjeni podataka.

Član 5.

U smislu ovog zakona:

1. Državljaninom BiH smatra se lice koje je steklo BiH državljanstvo u skladu sa odgovarajućim zakonskim aktima
2. Izbjeglicom iz BiH smatra se lice kojem je priznat status izbjeglice prema odgovarajućim zakonskim aktima
3. Raseljenim licem u BiH smatra se lice kojem je dodijeljen status raseljenog lica ili sličan status u skladu sa odgovarajućim zakonskim aktima, odnosno lice koje je podnijelo zahtjev za dojelu tog statusa
4. Dokaz o identitetu pruža se bilo kojom ispravom koja sadrži ime i datum rođenja lica i koja je, osim ako nije drugačije predviđeno odgovarajućim zakonom, izdata:
 - a) u periodu od 6. aprila 1991. god. do stupanja na snagu ovog zakona, na propisanom obrascu i na osnovu tada važećih propisa, od strane nadležnih organa, organizacija ili drugih pravnih lica kojima je povjereno vršenje javnih ovlaštenja u Bosni i Hercegovini, ili
 - b) izdatu prije 6. aprila 1992. god. od strane nadležnih organa bivše Socijalističke Federativne Republike Jugoslavije, ili nadležnih organa bivših socijalističkih republika i autonomnih pokrajina.
5. Dokaz o državljanstvu BiH pruža se ispravom ili drugim sredstvom priznatim kao dokaz o državljanstvu BiH u odgovarajućim zakonskim aktima
6. Pod prebivalištem smatra se opština ili distrikt u kojem se pojedinac nastani s namjerom da tamo stalno živi
7. Pod prebivalištem prije sukoba smatra se prebivalište državljanina, utvrđeno ranije važećim zakonima, koje je raseljeno lice ili izbjeglica napustila nakon 30. aprila 1991. godine, bez obzira da li se to lice odjavilo ili je bilo ojavljeno iz tog mjesta
8. Povratnikom se smatra BiH izbjeglica iz inostranstva ili raseljeno lice koje se već vratilo ili se vraća u svoje prebivalište prije sukoba. Takvo lice će se smatrati povratnikom dok ne dobije ličnu kartu od organa u svom prebivalištu prije sukoba. Da bi se smatralo povratnikom lice se ne mora vratiti na svoju adresu stanovanja prije sukoba
9. Pod boravištem smatra se opština ili distrikt u kojem se građanin nastani s namjerom da tamo privremeno boravi
10. Boravištem raseljenog lica smatra se opština ili distrikt u kojem se raseljeno lice nastani s namjerom da tamo privremeno boravi.

Poglavlje II - OBRAZAC LIČNE KARTE

Član 6.

Od državljanina koji podnosi zahtjev za izdavanje lične karte prikupljaju se sljedeći podaci koji se unose u ličnu kartu:

1. ime (imena)
2. prezime
3. datum rođenja
4. mjesto rođenja
5. opštinu prebivališta ili boravišta za raseljeno lice
6. pol
7. jedinstveni matični broj (JMB)
8. fotografiju
9. potpis
10. državljanstvo BiH.

Na ličnoj karti se takođe nalaze serijski broj isprave, datum izdavanja, rok važenja, podaci koje je moguće očitati kompjuterski te organ koji je izdao ličnu kartu.

Državljanin mora dati podatke o opštini rođenja, matičnoj državi, državljanstvu entiteta, poštanskom broju, adresi, entitetu i kantonu u kojem je nastanjen, ako postoji. Međutim, ovi podaci se neće nalaziti u ličnoj karti.

Naslov na ličnoj karti piše se na bosanskom, hrvatskom, srpskom, francuskom i engleskom jeziku. Tekst na bosanskom, hrvatskom i srpskom jeziku piše se latiničnim i ćirilničnim pismom, a pojedinačni podaci koje u obrazac lične karte unosi nadležni organ upisuju se samo latiničnim pismom.

Na zahtjev podnosioca zahtjeva za izdavanje lične karte, može se na ličnoj karti unositi i naziv entiteta.

Poglavlje III - IZDAVANJE LIČNE KARTE

Član 7.

Izdavanje, poništavanje i zamjenu ličnih karata u okviru svoje nadležnosti vrši se u Federaciji BiH kod policijske uprave pri kantonalnom ministarstvu unutrašnjih poslova, u Republici Srpskoj kod stanice javne bezbjednosti pri Ministarstvu unutrašnjih poslova RS, u Brčko Distriktu Bosne i Hercegovine, kod nadležnog organa, koji funkcionalno djeluje kao državna institucija.

Ličnu kartu izdaje nadležni organ prema prebivalištu državljanina, izuzev ličnih karata koje se izdaju raseljenim licima u boravištu raseljenog lica.

Nadležni organi entiteta postupaju kao drugostepeni organi u žalbenom postupku za odluke nadležnih organa za izdavanje, poništavanje i zamjenu ličnih karata.

Stranka nezadovoljna odlukom drugostepenog organa može uložiti žalbu Ministarstvu civilnih poslova i komunikacija BiH (u daljem tekstu: MCPK).

Član 8.

Lična karta se izdaje državljaninu koji je podnio zahtjev za izdavanje lične karte ili u čije ime je zahtjev podnio njegov propisno ovlašteni zakonski zastupnik na lični zahtjev ili na zahtjev njegovog zakonskog zastupnika.

Lična karta se može izdati i državljaninu starijem od 15, a mlađem od 18 godina koji ima prebivalište u BiH na lični zahtjev ili na zahtjev njegovog roditelja ili drugog propisno ovlaštenog zakonskog zastupnika.

Ličnu kartu državljanin mora da preuzme lično.

Član 9.

Ako državljaninu nije ranije izdata lična karta, dužan je da podnese zahtjev za izdavanje lične karte u roku od 60 dana nakon što navrší 18 godina života ili 60 dana nakon što se stalno nastani u BiH, ako je navršio 18 godina života.

Državljanin koji prvi put podnese zahtjev za izdavanje lične karte, uz zahtjev za izdavanje lične karte podnosi i dokaz o državljanstvu BiH i, ako se to traži, dvije fotografije odgovarajuće veličine koje vjerno prikazuju lice podnosioca zahtjeva.

U svim drugim slučajevima i osim ako nije drugačije uređeno ovim zakonom, uz zahtjev za izdavanje lične karte državljanin podnosi dokaze o identitetu i državljanstvu BiH i, ako se to traži, dvije fotografije odgovarajuće veličine koje vjerno prikazuju lice podnosioca zahtjeva.

Član 10.

Prilikom svakog podnošenja zahtjeva za izdavanje lične karte prema ovom zakonu, državljanin u zahtjevu mora navesti tačne i istinite podatke.

Član 11.

Nadležni organ je dužan da najkasnije u roku od 15 dana nakon podnošenja zahtjeva za izdavanje lične karte, izda ličnu kartu podnosiocu zahtjeva ako utvrdi da podnosilac ima pravo na istu.

Nadležni organ će podnosiocu zahtjeva odmah izdati potvrdu o prijemu zahtjeva za izdavanje lične karte.

Potvrda o prijemu zahtjeva služi kao dokaz da je državljanin podnio zahtjev za izdavanje lične karte.

Član 12.

Za izdavanje lične karte ne plaća se taksa.

Poglavlje IV - ZAMJENA LIČNE KARTE

Član 13.

Lična karta se mora zamijeniti:

1. ako je istekao rok njenog važenja
2. u slučaju promjene prebivališta (ili promjene boravišta kod raseljenih lica)
3. ako je došlo do promjene podataka koji su o imaoocu lične karte navedeni u ličnoj karti
4. ako je podatak u ličnoj karti netačan ili pogrešno upisan
5. ako je lična karta oštećena ili iz drugih razloga podaci nisu čitljivi u tolikoj mjeri da lična karta ne može služiti svojoj namjeni
6. kada je izgled imaooca lične karte toliko izmijenjen da više ne odgovara fotografiji na ličnoj karti.

Član 14.

Državljanin koji je u skladu sa prethodnim članom dužan da zamijeni ličnu kartu podnosi nadležnim organima zahtjev za zamjenu lične karte, a uz zahtjev za zamjenu lične karte, ako se to traži, prilaže dvije fotografije odgovarajuće veličine koje vjerno prikazuju lice podnosioca zahtjeva.

Državljanin dokazuje svoj identitet i tačnost podataka koji se upisuju u njegovu ličnu kartu na osnovu ranije izdate lične karte, ili, ako takve lične karte nema, dokazom o identitetu i dokazom o državljanstvu BiH, ukoliko na drugom mjestu u ovom zakonu nije drugačije predviđeno.

Član 15.

U okolnostima predviđenim u članu 13. tačka 1. ovog zakona, imalac lične karte dužan je da podnese zahtjev za zamjenu lične karte najkasnije do 15 dana prije datuma isteka važnosti sadašnje lične karte.

U okolnostima predviđenim u članu 13. tač. 2. i 3. ovog zakona, imalac lične karte dužan je da podnese zahtjev za zamjenu lične karte u roku od 60 dana od nastanka razloga za njenu zamjenu. Zamjena lične karte raseljenog lica ili povratnika pod tačkom 2. uređuje se u poglavlju VIII ovog zakona.

U okolnostima predviđenim u članu 13. tač. 4. ovog zakona, imalac lične karte dužan je da podnese zahtjev za zamjenu lične karte u roku od 60 dana od saznanja da je podatak u ličnoj karti netačan ili pogrešno upisan.

Ako nadležni organ utvrdi da je potrebno zamijeniti ličnu kartu iz razloga predviđenih u članu 13. tač. 5. i 6., odrediće rok u kojem je imalac lične karte dužan da podnese zahtjev

za zamjenu lične karte. Ovaj rok ne može biti kraći od 15 dana od dana kada je nadležni organ donio rješenje o zamjeni lične karte.

Ako imalac lične karte ne podnese zahtjev za zamjenu lične karte u roku predviđenom u ovom članu, sadašnja lična karta prestaje da važi, izuzimajući član 15. stav 1. Ako imalac lične karte ne podnese zahtjev za zamjenu lične karte u skladu sa članom 15. stav 1., lična karta prestaje da važi od datuma isteka.

Član 16.

Nadležni organ će podnosiocu zahtjeva odmah izdati potvrdu o prijemu zahtjeva za zamjenu lične karte.

Potvrda o prijemu zahtjeva služi kao dokaz da je lice podnijelo zahtjev za zamjenu lične karte.

Nadležni organ je dužan da zamijeni ličnu kartu odmah ili najkasnije u roku od 15 dana nakon podnošenja zahtjeva za zamjenu lične karte, ako utvrdi da podnosilac zahtjeva ima pravo na takvu zamjenu lične karte. Zamijenjena lična karta se poništava i vraća podnosiocu zahtjeva, ako on to zatraži.

Poglavlje V - ROK VAŽENJA LIČNE KARTE

Član 17.

Državljaninu starijem od 18 godina izdaje se lična karta sa rokom važenja od deset godina.

Državljaninu starijem od 15, a mlađem od 18 godina izdaje se lična karta sa rokom važenja od dvije godine.

Državljaninu starijem od 60 godina izdaje se lična karta sa rokom važenja - trajno.

Član 18.

Ako, iz razloga utvrđenih u Zakonu o putnim ispravama BiH, nadležni sud ili organ koji je nadležan da uređuje pitanje putnih isprava prema tom zakonu zabranjuje izdavanje putnih isprava državljaninu, sud odnosno organ upućuje odgovarajući nadležni organ da zabrani licu korištenje lične karte za prelazak državne granice.

Nadležni organ donosi rješenje o zabrani te u skladu s tim i o tom rješenju obavještava sud ili organ koji je zahtijevao donošenje zabrane. Ova zabrana se unosi u ličnu kartu na način koji propisuje MCPK.

Član 19.

Nadležni sud ili organ iz stava 1. prethodnog člana, bez odlaganja obavještavaju nadležni organ o prestanku postojanja razloga za zabranu korištenja lične karte za prelazak državne granice.

Po ispunjenju uslova utvrđenih u prethodnom stavu nadležni organ poništava zabranu korištenja lične karte za prelazak državne granice.

Poglavlje VI - GUBITAK LIČNE KARTE

Član 20.

Državljanin koji je izgubio ličnu kartu ili mu je lična karta ukradena, uništena ili je na bilo koji drugi način ostao bez nje, dužan je da tu činjenicu bez odlaganja lično prijavi najbližoj policijskoj stanici ili nadležnom organu. Policija je dužna da o tome odmah obavijesti nadležni organ.

Državljanin koji je prema ovom zakonu dužan posjedovati ličnu kartu, a koji je izgubio ličnu kartu tokom boravka u inostranstvu, dužan je obavijestiti najbliže Kancelarije diplomatsko-konzularnih predstavništava BiH u inostranstvu (u daljem tekstu: DKP) i podnijeti zahtjev za novu ličnu kartu. DKP obavještava MCPK o gubitku, a u skladu s tim, MCPK o istom obavještava nadležni organ koji je licu izdao ličnu kartu. Nadležni organ tom licu izdaje novu ličnu kartu putem MCPK i DKP-a.

U okolnostima iz stava 1. ovog člana, nadležni organ izdaje rješenje o poništenju lične karte.

Član 21.

U slučaju da državljani, u okolnostima navedenim u članu 20. stav 1. ovog zakona više ne posjeduju ličnu kartu, dužan je da u roku od 30 dana od dana prijavljivanja slučaja policiji, podnese zahtjev za izdavanje nove lične karte. Uz zahtjev se prilaže izvještaj iz policije, dokaz o identitetu, dokaz o državljanstvu BiH, i ako se to traži, dvije fotografije koje vjerno prikazuju lice podnosioca zahtjeva.

Ako državljani kome je na osnovu ovog člana izdata nova lična karta, naknadno dođe u posjed ranije lične karte, dužan je da tu ličnu kartu odmah preda najbližem nadležnom organu.

Nadležni organ izdaje ličnu kartu podnosiocu zahtjeva najkasnije u roku od 15 dana od dana podnošenja zahtjeva za izdavanje lične karte, ako se ustanovi da podnosilac ima pravo na ličnu kartu.

Nadležni organ odmah izdaje podnosiocu zahtjeva potvrdu o prijemu zahtjeva za izdavanje lične karte.

Potvrda o prijemu zahtjeva služi kao dokaz da je lice podnijelo zahtjev za izdavanje lične karte.

Poglavlje VII - EVIDENCIJA LIČNIH KARATA

Član 22.

U skladu sa Zakonom o centralnoj evidenciji i razmjeni podataka, MCPK vodi i održava centralnu evidenciju putem elektronske obrade podataka (u daljem tekstu: centralna evidencija) o izdatim, zamijenjenim i poništenim ličnim kartama.

Entitetska ministarstva unutrašnjih poslova mogu održavati elektronsku evidenciju o ličnim kartama koje su izdate, zamjenjene ili poništene na području entiteta.

Nadležni organ vodi i održava mjesnu evidenciju putem elektronske obrade podataka (u daljem tekstu: mjesna evidencija) o ličnim kartama koje su u njegovoj jurisdikciji izdate, zamijenjene i poništene.

Član 23.

Centralna, entitetske i mjesne evidencije sadrže sljedeće lične podatke:

- a) podaci sadržani u članu 6. st. 1. do 3.
- b) sve pojedinosti o nestanku lične karte kako je predviđeno u glavi poglavljuVI ovog zakona
- c) napomena o zabrani korištenja lične karte za prelazak državne granice kako je predviđeno u članu 18. ovog zakona.

Član 24.

Nadleži organ je dužan da redovno dostavlja MCPK podatke iz svoje mjesne evidencije.

MCPK može obezbijediti podatke iz centralne evidencije nadležnom organu kako bi isti izvršavao svoje dužnosti propisane Zakonom.

Član 25.

Organi ovlašteni za vođenje i održavanje centralne, entitetskih i mjesnih evidencija u članu 22. mogu prikupljati, obrađivati, pohranjivati i koristiti lične podatke iz evidencije jedino u svrhu provođenja ovog zakona, ako zakonom nije drugačije propisano.

Podaci iz člana 23. ovog zakona brišu se pri izdavanju nove lične karte ili pet godina nakon isteka roka važenja lične karte.

Izuzetno od stava 2. ovog člana, napomena o zabrani korištenja lične karte za prelazak državne granice kako je predviđeno u članu 18. briše se nakon godinu dana od prestanka postojanja razloga za upisivanje te informacije.

Član 26.

Državljanin BiH ima pravo da bude obaviješten o tome da li se njegovi lični podaci nalaze u centralnoj, entitetskoj i mjesnoj evidenciji i ima pravo da mu se ti podaci saopšte u jasnoj formi.

Ako se utvrdi da su takvi podaci obrađeni na nezakonit ili nepravilan način, državljanin o čijim se podacima radi ima, pravo na odgovarajuću ispravku ili brisanje tih podataka. Takva ispravka ili brisanje podatka je za datog državljanina besplatna.

Državljanin o čijim se podacima radi ima pravo da pokrene upravni spor u slučaju da navedeni organi ne postupe u skladu sa odredbama ovog člana.

Član 27.

MCPK i nadležni organi obavezni su preduzeti dovoljne sigurnosne mjere da bi se osigurala zaštita svih podataka iz centralne i mjesnih evidencija i svih podataka prenesenih na druge ovlaštene organe, u skladu sa Zakonom o centralnoj evidenciji i razmjeni podataka.

Poglavlje VIII - POSEBNE ODREDBE

Član 28.

Lica na koja se odnose odredbe iz ove glave su raseljena lica i povratnici.

Član 29.

Raseljenom licu se izdaje lična karta prema boravištu.

Raseljeno lice podnosi zahtjev za izdavanje lične karte u roku od 60 dana od dana privremenog nastanjenja.

Lična karta izdata u boravištu raseljenog lica važi dvije godine.

Član 30.

Prilikom svakog podnošenja zahtjeva za izdavanje lične karte po odredbama ovog poglavlja, raseljeno lice podnosi zahtjev za izdavanje lične karte i uz njega prilaže, ako se to traži, dokaz o identitetu i dvije fotografije odgovarajuće veličine, koje vjerno prikazuju lice podnosioca zahtjeva.

Član 31.

Povratnik u mjesto prebivališta prije sukoba ima pravo da zamijeni ličnu kartu koja je ranije izdata, na osnovu ovog zakona, u mjestu boravišta povratnika, kako je utvrđeno u ovom poglavlju, ličnom kartom koju izdaje nadležni organ u mjestu prebivališta prije sukoba.

Član 32.

Povratnik koji ima pravo da zamijeni ličnu kartu kako je utvrđeno u ovoj glavi, podnosi zahtjev za zamjenu lične karte u roku od 60 dana od dana povratka u svoje mjesto prebivališta prije sukoba.

Prilikom svakog podnošenja zahtjeva za zamjenu lične karte po odredbama ovog poglavlja, povratnik podnosi zahtjev za zamjenu lične karte i uz njega prilaže, ako se to traži, dokaz o identitetu i dvije fotografije odgovarajuće veličine koje vjerno prikazuju lice podnosioca zahtjeva.

Ako ne posjeduje ličnu kartu izdatu u prijašnjem mjestu prebivališta, povratnik podnosi zahtjev za izdavanje lične karte u skladu sa poglavljem III ovog zakona.

Član 33.

Ako nijedan dokumentovani ili drugi dokaz, odnosno podatak vezan za podnošenje zahtjeva za izdavanje ili zamjenu lične karte, prema ovoj glavi nije na raspolaganju, nije dostupan ili se ne može pribaviti u razumnom roku, nadležni organ će dozvoliti podnosiocu da

traženi dokaz ili informaciju pruži na drugi način, uključujući i izjave podnosioca zahtjeva ili izjave koje daju druga lica u korist podnosioca zahtjeva.

Član 34.

Raseljeno lice koje dobrovoljno odluči da se stalno nastani u mjestu u kojem nije imalo prebivalište prije sukoba, ima pravo da zamijeni ličnu kartu ranije izdatu prema ovom zakonu, kako je utvrđeno u ovoj glavi, ličnom kartom koju izdaje nadležni organ u njegovom novom prebivalištu.

Poglavlje IX - KAZNE ODREDBE

Član 35.

Postupak iz ove glave vodiće se u skladu sa relevantnim zakonima o prekršajima.

Član 36.

Novčanom kaznom u iznosu od 200 KM do 1.000 KM kazniće se odgovorno lice u nadležnom organu za prekršaj ako:

1. odmah ili najkasnije u roku od 15 dana od dana podnošenja zahtjeva za izdavanje lične karte ne izda ličnu kartu podnosiocu zahtjeva ako je utvrđeno da ima pravo na ličnu kartu, uključujući raseljena lica koja prijavljuju boravište i povratnike u mjesta njihovog prebivališta prije sukoba
2. ne izda podnosiocu zahtjeva potvrdu o prijemu zahtjeva u slučaju kada nije odmah izdao ličnu kartu podnosiocu zahtjeva
3. odmah ili najkasnije u roku od 15 dana od dana podnošenja zahtjeva za zamjenu lične karte ne zamijeni ličnu kartu ako utvrdi da podnosilac zahtjeva ima pravo na zamjenu
4. prikuplja, obrađuje, čuva, koristi ili prenosi podatke iz svoje evidencije protivno čl. 25. i 26. ovog zakona
5. odmah ili najkasnije u roku od 15 dana od dana podnošenja zahtjeva ne obezbijedi ličnu kartu izdatu u mjestu boravišta raseljenog lica
6. odmah ili najkasnije u roku od 15 dana od dana podnošenja zahtjeva ne izda ličnu kartu povratniku u mjestu njegovog prebivališta prije konflikta
7. ne dozvoli da se informacija u svrhu zahtjeva za izdavanje lične karte pruži drugim sredstvima, uključujući i izjave koje daje podnosilac ili druga lica u korist podnosioca u skladu sa odredbama poglavlja VIII ovog zakona.

Član 37.

Novčanom kaznom od 10 KM do 100 KM kazniće se za prekršaj državljanin ako:

1. ima više od jedne lične karte izdate na osnovu ovog zakona
2. ne podnese zahtjev za izdavanje lične karte kada je obavezan da tako postupi prema poglavlju III

3. svjesno dostavi netačne i/ili neistinite podatke prilikom podnošenja zahtjeva za izdavanje lične karte
4. odmah ne prijavi nestanak lične karte
5. ustupi svoju ličnu kartu drugom licu ili koristi tuđu ličnu kartu kao svoju
6. koristi ličnu kartu drugog lica u svrhu pribavljanja bilo kakve koristi ili prava.

Poglavlje X - PRELAZNE I ZAVRŠNE ODREDBE

Član 38.

Kada se ispune svi neophodni uslovi za otpočinjanje procesa za izdavanje lične karte, ministar Ministarstva civilnih poslova i komunikacija u tu svrhu donosi odgovarajući akt.

Član 39.

Ako je lična karta pribavljena pomoću prevare, lažnim informacijama ili prikrivanjem bilo koje bitne činjenice koja se odnosi na podnosioca zahtjeva, takva lična karta se oduzima i poništava.

Član 40.

Nadzor nad provođenjem ovog zakona vrši MCPK tako što:

- a) kontroliše zakonitost upravnih akata i radnji nadležnih organa
- b) predlaže, odnosno pokreće postupak ocjene zakonitosti upravnih akata nadležnih organa u skladu sa zakonom
- c) nalaže nadležnom organu izvršenje ovim zakonom određenih obaveza
- d) donosi uputstva i instrukcije radi jedinstvenog postupanja nadležnih organa.

U roku od 90 dana od dana objavljivanja ovog zakona u " Službenom glasniku BiH" , MCPK donosi propise o:

- a) zajedničkom obrascu zahtjeva za izdavanje lične karte i za zamjenu lične karte
- b) pojedinostima vezanim za obrazac lične karte i podacima sadržanim u ličnoj karti
- c) pravilnik o cijeni lične karte
- d) pravilnik o nadzoru nad provođenjem ovog zakona
- e) podzakonski akt o napomeni koja se upisuje u ličnu kartu kojom se navodi da je korištenje lične karte zabranjeno za prelazak državne granice
- f) svim drugim pitanjima neophodnim za provođenje ovog zakona.

Član 41.

Danom izdavanja rješenja MCPK-a iz člana 38. stava 1., prestaju da važe zakoni i propisi, kojima su se do tada regulisala pitanja vezana za ličnu kartu državljana i koji su se primjenjivali u BiH.

Član 42.

Ovaj zakon stupa na snagu 30 dana od dana objavljivanja u " Službenom glasniku BiH" , a objaviće se i u službenim glasilima entiteta i Brčko Distrikta Bosne i Hercegovine.

PS BiH broj 70/'01 20. oktobra 2001.godine Sarajevo

Predsjedavajući Doma naroda Parlamentarne skupštine BiH Sejfudin Tokić, s. r.

Predsjedavajući Predstavničkog doma Parlamentarne skupštine BiH dr.Željko Mirjanić, s. r.